

# Van n olle soeterge keerze



## Een Kerstverhaal door Jan Boer

De winter van twijnsesteg op drijnsesteg was eine van de strengsten dij wie ooit had hebben.

t Vroor dat t knapte en de Oostenwind, dij duchteg bluis, muik t aalmoal nog veul slimmer.

t Laand was hard bevroren en de snij was op bulten jagd; nait allend op de loanen van t boerenlaand, mor ook in de stroaten van t dorp.

De braidste stroaten wazzen wel n poar moal deur n snijploug schoon veegd, mor dat holp mor n zetje.

Even loater was t weer net zo. Wie wazzen, as ter op aan kwam, van de wereld ofsloten.,

t Was eerste Kerstdag – Midwinterdag, zoas de lu hier zeden.

As der nou mor nait aine noar t zaikenhuus mout, docht ik, want den zel je wat beleven.

t Volk begreep wel, dat ik nait zo vlot deur dij snijboudel hin komen kon en as t aits kon ruipen ze mie den ook nait.

Mor toch mos ik soavends loat nog noar n kind van n joar of vare tou, dij dikke koorze haar.

Dij lu woonden midden in t veld, dus ik mos der wel lopend hin.

Ik klonterde over t kloeterge laand, onderwiel ik mien hanschen veur de mond huil, zo kold was t.

Mor goud, dou ik t kind n spoitje geven haar tegen de koorze, muik ik vlot weer aanstalten om noar huus tou te goan.

Op de weeromraaize luip ik over t ies van n sloot; dat luip wat makkelker as over t laand.

Mor verachtjond, zo zel je t aaltied beleven, inains zakte ik deur t ies hin.

t Was doar n tochtgat en tot aan t kruus tou ging ik ter in.

Mizze, mizze nat was k, en kold...

Mien laive tied, zo kold was k nog nooit west.

Dou k tegen de wale weer op klaauwsterd was, begreep ik wel dat ter niks aans op zat as om noar Knelus en Stiene tou te goan, dij doar in de buurt woonden, om wat klaaier en n poar stevels van Knelus te lainen.

Ik haar der aiglieks nait zo veul belang bie om doar hin te goan, want Knelus en Stiene huilen joe aaltied aan de proat, doar kwam je mor nait zo aintwij-drij weer vot.

Mor om zo mit mien nadde plunnen aan hailemoal noar huus te lopen, neen, dat ging ook nait.

Den toch mor noar Knelus en Stiene.